

14 taman eko rimba Pahang diswasta

Oleh **Mohd Rafi Mamat** - Mac 14, 2022 @ 9:11am

bhnews@bh.com.my



Ketua Pengarah Perhutanan Semenanjung Malaysia, Datuk Mohd Ridza Awang (tiga dari kanan) dan Pengarah Jabatan Perhutanan Negeri Pahang (JPNP), Datuk Dr Mohd Hizamri Mohd Yasin (dua dari kanan) ketika melawat Taman Eko Rimba Parit Fall. - Foto NSTP/Mohd Rafi Mamat

CAMERON HIGHLANDS: Jabatan Perhutanan Negeri Pahang (JPNP) menswastakan 14 kawasan ekopelancongan berstatus Hutan Simpan Kekal di negeri ini yang berada dibawah selian pihaknya.

Pengarahlanya, Datuk Dr Mohd Hizamri Mohd Yasin, berkata di Pahang terdapat sebanyak 26 Taman Eko Rimba (TER) yang menjadi antara produk pelancongan terkenal di setiap daerah.

Katanya, keputusan penswastaan berkenaan bertujuan untuk menjadikan pusat pelancongan terabit dapat diurus dengan lebih sempurna, seterusnya mampu menarik kehadiran lebih ramai pelancong.

Katanya, antara TER yang telah diswastakan ialah TER Sungai Pandan, TER Berkelah, TER Lubuk Yu, TER Kenong, TER Kem Nusa, Air Terjun Pelangi, Hutan Konifer, Air Terjun Ulu Tampik dan Pusat Kecemerlangan Alam Sekitar Sungai Tabung (PKAS).

Beliau berkata, turut diswastakan Taman Negeri Rompin (TNR) yang terletak dalam kawasan Hutan Simpan Endau-Rompin.

"Peruntukan RM15 juta disediakan Majlis Pembangunan Wilayah Ekonomi Pantai Timur (ECERDC) untuk menaik taraf tempat berkenaan dengan pelbagai kemudahan serta produk yang dapat menarik kehadiran pelancong tempatan dan antarabangsa.

"Kita tidak mampu untuk menguruskan semua TER yang terdapat di negeri ini, justeru hanya dengan penswastaan sahaja dapat menyelesaikan masalah berkenaan.

"Negeri ini sememangnya kaya dengan produk ekopelancongan terletak dalam Hutan Simpan Kekal, ia mampu memberi sumber pendapatan kepada kerajaan negeri," katanya.

Beliau berkata demikian pada Majlis Penyerahan Tapak Projek Cameron Highlands Montane Park (CHiMP) yang disempurnakan oleh Ketua Pengarah Perhutanan Semenanjung Malaysia, Datuk Mohd Ridza Awang di TER Parit Fall, di sini, semalam.

Hadir sama, Ketua Pengarah Institut Penyelidikan Perhutanan Malaysia (FRIM), Dr Ismail Parlan.

CHiMP yang menjadi pusat penyelidikan dan konservatori mengumpul lebih 300 pelbagai tumbuhan hutan pergunungan

terletak dalam TER Parit Fall Hutan Simpan Ulu Bertam sebelum ini diuruskan FRIM kini diserahkan semula kepada JPNP.

Mohd Hizamri berkata, kerjasama projek CHiMP tamat pada 31 Disember 2020 dan kerajaan Pahang membuat keputusan bahawa tapak projek CHiMP perlu diserahkan semula kepada JPNP sebelum diswastakan.